

Die färschtliche Chrischtbaamlich

Eine Hohenloher Weihnachtsgeschichte

Von Ingaruth Schlauch

Unvergeßlich ist mir jene Vorsetz in Steffensbauern Haus, als der alte Schustersmichel die Geschichte von den Christbäumen erzählte. Wir alle saßen gemütlich in der großen Stube, die Madlich hatten längst ihre Spinnräder auf die Seite gestellt und langten nach den rotbackigen Äpfeln, die die Bäuerin im „Noopf“ anbot, den Buben aber hatte der Bauer einen frischgebrannten Zwetschgenschnaps eingeschenkt, dabei war ihnen der alte Michel um drei bis vier Gläschen voraus. Und wenns bei ihm soweit war, kam er ins Plaudern und begann eins von den „Gschichtlich“ zu erzählen, von denen er so viele wußte.

S'is grad aa Adventszeit gwe, ma Großvatter selich hat die ganz Gschicht selwer mitderlebt. Der alte Färscht hat a große Jachd veroustalt ghot, die hat vier Döäch lang dauert. Die ganz Zeit hats gschosse in dene Wälder, daß gmaant hasch, d'Franzouse kumme. Räh häwes gschosse un Fux un Wildsäu un Hoose hats sou dunndersmäßig viel gewe, daß an die Dierlich grad dauerd häwe, wie's sou aufm Haufe banander gleiche san. Am finfte Dooch is als a gueter Abschlus a groß Festesse im Schloß gwese. Scho midoochs hats ougfange und hat bis wait in d'Noocht nei dauert. Ihr kennt aich jo denke, die Färschter un Jäächer häwe alle Händ voll z'done ghot, die aane häwe ufftrooche müsse, Platte iwer Platte, die andere häwe für Wei z'sorche ghat, häwe sich awer bei der Ärwet droughalte, sou daß's selwer net z'korz kumme san, jedenfalls Färschter un Jäächer sann alle im Schloß z'sammetrommelt gwe. Is vorher umgange in dene Wälder, wie wenns wild Heer gwütet häät, jatz wors mucksmaislesstill. A jeds Ästle hat mr knacke häre.

Hätte d'Lait em Oord um die Zeit sunscht Mischt geführt, sou is grad wie ausgmacht gwee – mr hat

kan Mischtwooche fohre seeche, awer anneweche häwe d'Bauere alle notwendig ghot. Dr aa hat sich hinter der Schaire a weng z'schaffe gmacht und is nou sou haalich naus zum Oord. Der ander hat d'Gail eigespannt un secht zu sam Kneecht, er woll die Welle vollster hole, der Kneecht schüttelt de Koupf un murmelt: „Jetzt wo die grad z'sammgschnait san, do muß mr bloß wundere.“ Der Seilerhannes seecht zu sannere Bawett: „I sett doch emol de lange Weech dageichelaafe und gucke, ob s'Mariele net von Kinzelsa hammkummt.“ Der Jerch hängt d'Häwe um, daß s'Noochbrs Mine secht: „Jetzt kou i nimme, will der auf de Owed no ins Houlmache gäne!“ Sou hat jeder ebbes z'traiwe oder z'done ghot, die Mannslait vom halwe Dorf ware underweechs. Kalt is gwe an sellem Dooch, die Hoose wou von dere Jachd no iwrighbliewe san, san froh gwe, daß endlich Ruh gewe hat vun dere Schießerei, awer wie der Schnäa unter de Männerschtiefel knärscht hat, wie's dort und driwe un hinte in de Büüschnack, frooche sie sich: „Wie, do is noune ganz sauwer.“ S'war aa merkwerdich: Im vordere Hölzle im Kahlschlooch un im Reut, iweroll hat mr ebbes ummerdappe häre. Mr hat maane könne, s' gaaschtert. Un werklich – em Reut stäht der Jerch, er denkt gor net ans Houlmache, hat d'Häwe in der Hend, guckt rechts un links un immer a weng nach hinte. Wie er awer nix siecht, gäht er schnurstracks auf die Fiechteschonung zu, die Fiechtlich san dogstande wie d'Saldote, aufrecht und der Schnäa is auf'n gleeche sou fei wie auf der Bawett ihre Zuckerdoggelich.

Er gäht heredo, guckt des Fiechtle ou un sell, zmol hat er aas gseeche, a setts schäas, des tät grad in die groß Stuwe neibasse, er langt nach saner Häwe, und tut de erste Schlooch – awer schiergar hätn sel-

wer der Schlooch troffe. „Gudenowed“ secht hinter'm der Seilerhannes, „die Chrischtbaam vom Färschte san doch schänner un sou woulfaal, gelt?“ Und des Schlitzohr lacht und weist sa Baamle vor, des er unterm Ärfele hat. „Laß de norr net schtäre beim G'schäft“ secht er. Was will der Jerch aa mache, halwe rooghawe hat er des Baamle scho, kan Summer täts souwiesou nimme derlewe, noch a poor Schlääch und die zwaa gäne einträchtlich uff de Hammweech zu. Nooch un nooch is Zwischeliacht wora und wie die zwaa grod ufm lange Weech oukumme, seeches de Frieder mit 'm leere Wooche hammfohre, bevors norr froche könne, ruft er'n zu: „Hob Welle hole wölle, awer s'is uumöchlich gwe, i muß leer hammfohre.“ Der Seilerhanns, wou als nosewais un keck bekannt gwe is, lupft a Gailsdeck aufm Wooche dait uf a ooghaawes Dannebaamle un lacht: „Ha ganz leer musch ja doch net hammfohre, hasch ewe a en Chrischtbaam gfunde wie mir.“ Se treffe nochmal zwaa, wo die gleich Fracht mit hammbringe. S'halb Färschtewäldle war unterweechs hammzu. Natürlich is a d'Kraiterlies derzukumme. Die sell, des waaß je jeds Kind, is jede Dooch, bei Wiind und Wetter im Wald draus. Im Summer Kraiter hole, im Winter Houlz lese. Nosewais un a weng boushäftig is a gwese, aufn ärschte Blick siechts natierlich, was die Mannslait done häwe, kichert a weng vor sich nou und secht: „Sou, sou, Maiebläämlich groppt?“ Un scho wuselts aufme Saiteweech s'Dool no. Glai am nächschte Dooch siecht der Owerfärschter die Bescherung, gäht wale ins Schloß zum Färschte: „Dorchlaucht, zu mamm Laidweise muß ich melden, daß die schönsten Tannenbäumchen im Reut herausgehauen wurden, bis jetzt fehlt von den Tätern jede Spur.“ Der Färscht hat se grod a Pfaille ouzünde welle, leechts awer entrüschet nou und secht: „Das is ja unerhört! Aber die Täter, diese Waldfrevler, sollens mir büßen!“ „Ja, Schustersmichel, is des iwerhaapts rauskumme?“ fragte Lindenbauers Frida dazwischen. Der Schustersmichel zwärwelt an sam Schnorre, hat vor se nouglacht und gsocht: „S'is a aafache Sach gwe. Em Owerfärschter is eigfalle, daß d'Kraiterlies jede Dooch im Wald daus is, un wenn ebber ebbes waaß is die's. Die hat er also vor de Färschte zitiert, un d'Kraiterlies hat se woul denke könne, daß' nounge s'Chrischtkindle im Schloß ohole därf, denn des hat'r die alt Fraa Färschte allweil persönlich ime Deckel-

korb vorm Hailiche Owed broocht – se hat e guets Herz ghoot für de klaane Lait. Ängscht hats ghot, d'Kraiterlies, ganz woul is'r net gwe. Dr Färscht hat net lang frooche brauche, Kraiterlies hat alles glai ausplaudert. Und der Färscht hat en arge Zore ghot iwer die Sach.

I wills korb mache: Andern Doochs läßt der Färscht die ganze Mannslait mitsamt de gstoulene Christbaam ins Schloß kumme. S'is a dunndersmäßige Kält gwe und die Finger san en schier an die Baamlich nougfrore. Die Waiwer dahamm häwe ghailt, des kou mr se denke: „Sou a Schand, sou a Schand!“ S'hat zum Lache ausgseeche, wie die Kerlich mit ihre Baamlich derherzottelt san. Vorm Färschte sans no gstande mit ihre Armsindergsichter, häwe gschlortert vor Kält und vor Ängscht vor dem fürchterliche Zore vom Färschte. Zärscht hat se der Färscht aa wacker gstutzt, sei Zore is awer scho a Weile verraacht gwe un Weihnachte is ja aa vor der Türe gstande. Er hatn' befohle, daß im nächste Johr jeder fünfzig Fiechtlich en san Wald pflanze muß, daß Kiind und Kindeskiind kane Chrischtbaam me im Färschtewald z'stehle brauche.

Die Bauere häwe aufgschnauft, daß sou guet oogange is. Zmol seeches', wie der Färscht en Lakai winkt, dem ebbes ins Ohr brisselt, un scho wieder krieche's naie Ängscht. Dr Lakai läßt naus un kummt mitm schääne silwriga Tablett rei, drauf schtäne geschliffene Gläslig mitm a ganz guete süße Schnaps, sou ebbes Franzäsich muß gwese san. Die Baure häwe die guete Schnäps trunke, der Färscht – er hot drbei glähelet – awer ans hat er noch von en verlangt: A jeder hat san gschtoulene Christbaam nochmol vom Färschte gschenkt kriecht un hatn wieder mit hammtrooche misse. Im Städtle is des Ding natierlich wie a Laaffaier rumgange, die Waiwer san hinter de Vorhäng gstande un häwe nausgespitzt. Wie der Christbaamleszuch ausm Houfgarte rauskumme is, hammzues, no häwe sich d'Lait nimme halte könne vor Lache un d'Kiind san hinte nooch gschprunge. Der Schustersmichel hatte die Geschichte zu Ende erzählt, ein weiteres Gläslein getrunken und noch angefügt: „Un deszweeche häwe aier Lait alle a klaas Fiechtewäldle, weil aire Großvätter sellemool die Chrischtbaam em Färschtewald roghawe häwe.“ „O Schustersmichel, un ihr glaabt werklich, daß d'Lait vom Oord ihr Christbääm nimme im Färschtewald hole? I net!“